

কওমির দাওরায়ে হাদিস মাস্টার্স মর্যাদায়



প্রস্তাবিত আইন অনুযায়ী বিদ্যমান ছয়টি কওমি মাদরাসা বোর্ডের সমন্বয়ে একটি কওমি মাদরাসা শিক্ষা বোর্ড থাকবে। ‘আল-হাইয়াতুল উলইয়া লিল জামিয়াতিল কওমিয়া বাংলাদেশ’ নামের কমিটিই এই বোর্ড হিসেবে কাজ করবে। এর কার্যালয় হবে ঢাকা। কমিটির চেয়ারম্যান হবেন বেফাকুল মাদারিসিল আরাবিয়া বাংলাদেশের সভাপতি। এ কমিটি সনদবিষয়ক সব কার্যক্রমের ক্ষেত্রে সর্বোচ্চ সিদ্ধান্ত গ্রহণকারী বলে বিবেচিত হবে। কমিটির নিবন্ধিত মাদরাসাগুলোর দাওরায়ে হাদিসের সনদ মাস্তার্সের সম্মান বলে বিবেচিত হবে। দাওরায়ে হাদিসের পরীক্ষাও হবে এই কমিটির অধীনে। দাওরায়ে হাদিসের সিলেবাস প্রণয়ন, পরীক্ষাপদ্ধতি, পরীক্ষার সময় নির্ধারণ, অভিন্ন প্রশ্নপত্র প্রণয়ন, উত্তরপত্র মূল্যায়ন, ফলাফল, সনদ তৈরিসহ আনুষঙ্গিক সব

কার্যক্রম পরিচালনার জন্য এক বা একাধিক উপকমিটি গঠন করতে পারবে ওই কমিটি। এসব বিষয় শিক্ষা মন্ত্রণালয়কে অবহিত করবে ওই কমিটি। প্রস্তাবিত আইন অনুযায়ী, এ কমিটি দলীয় রাজনীতির উর্ধ্বে থাকবে।

মন্ত্রিপরিষদসচিব সাংবাদিকদের বলেন, ‘কয়েকজন বিশিষ্ট ব্যক্তিকে নিয়ে একটি কমিটি করা হয়। তারা কওমি মাদরাসা শিক্ষা বোর্ডের মতো কাজ করবে। সেটাকে অনেকটা এখানে নিয়ে আসা হয়েছে। এটি ১০টি ধারার একটি আইন।’

খসড়া আইনে বিভিন্ন বিষয়ে সংজ্ঞা দেওয়া আছে জানিয়ে মন্ত্রিপরিষদসচিব বলেন, ‘কওমির সংজ্ঞায় বলা হয়েছে—আহলে সুন্নাহ ওয়াল জামাত ও দারুল উলুম দেওবন্দের আদর্শ মূলনীতি ও মত-পথের অনুসরণে মুসলিম জনসাধারণের আর্থিক সহায়তায় ওলামায়ে-কেরামের মাধ্যমে প্রতিষ্ঠিত ও পরিচালিত ইলমে ওহির শিক্ষাকেন্দ্র।’

কওমি মাদরাসার দাওরায়ে হাদিস সনদকে মাস্তার ডিগ্রি সমমান দেয়ার বিষয়টি আগেই হয়ে আসছে জানিয়ে শফিউল আলম বলেন, ‘এখন সেটাকে আইনের কাঠামোতে নিয়ে আসা হয়েছে। এখানে একটি বোর্ডের বিষয় রয়েছে। এটির নাম হচ্ছে—আল-হাইয়াতুল উলিয়া লিল জামিয়াতিল কওমিয়া বাংলাদেশ।’

শফিউল আলম বলেন, ‘এখন ছয়টি কওমি মাদরাসা শিক্ষা বোর্ড আছে ওনাদের নিজস্ব ব্যবস্থাপনায়। একেক এলাকায় একেকটি। বেফাকুল মাদারিসিলি আরাবিয়া বাংলাদেশ, বেফাকুল মাদারিসিল কওমিয়া গওহরডাঙ্গা বাংলাদেশ, আঞ্জুমানে ইত্তেহাদুল মাদারিসিল বাংলাদেশ, আজাদ দ্বিনি এদারায়ে তা’লিম বাংলাদেশ, তানজিমুল মাদারিস দ্বিনিয়া বাংলাদেশ ও জাতীয় দ্বিনি মাদরাসা শিক্ষা বোর্ড বাংলাদেশ। বাংলাদেশে যত কওমি মাদরাসা আছে, সেগুলোকে এই ছয়টি বোর্ড নিয়ন্ত্রণ করে। এই ছয়টি বোর্ড নিয়ে আল-হাইয়াতুল উলিয়া লিল জামিয়াতিল কওমিয়া বাংলাদেশ গঠন করা হবে। এটিই হবে কওমি মাদরাসা শিক্ষা বোর্ড।’

আল-হাইয়াতুল উলিয়া লিল জামিয়াতিল কওমিয়া বাংলাদেশ-এর কমিটিতে ৯ ধরনের ব্যক্তি থাকবেন জানিয়ে শফিউল আলম বলেন, ‘বেফাকুল মাদারিসিলি আরাবিয়া বাংলাদেশের চেয়ারম্যান হবেন কমিটির সভাপতি। কো-চেয়ারম্যান হবেন বেফাকুল মাদারিসিলের সিনিয়র সহসভাপতি। বেফাকের আরো পাঁচজন সদস্য, এটা পদাধিকারবলে বেফাকের মহাসচিব বা বোর্ড নির্ধারণ করে দেবে।’

এ ছাড়া কমিটিতে বেফাকুল মাদারিসিল কওমিয়া গওহরডাঙ্গার দুজন সদস্য, আঞ্জুমানে ইত্তেহাদুল মাদারিসিল কওমিয়ার দুজন সদস্য, আযাদ দ্বিনি এদারায়ে তা’লিমের দুজন সদস্য, তানজিমুল মাদারিসিল কওমিয়ার দুজন সদস্য, জাতীয় দ্বিনি মাদরাসা শিক্ষা বোর্ড বাংলাদেশের দুজন সদস্য কমিটিতে থাকবেন। চেয়ারম্যান ইচ্ছা করলে কমিটিতে যেকোনো সদস্য অন্তর্ভুক্ত করতে পারবেন। তবে সেই সংখ্যা ১৫ জনের বেশি হবে না বলেও জানান মন্ত্রিপরিষদসচিব।

এরই মধ্যে যত সনদকে স্বীকৃতি দেওয়া হয়েছে, সেগুলো এই আইন অনুযায়ী হয়েছে গণ্য করা হবে বলে খসড়ায় উল্লেখ করা হয়েছে। শফিউল আলম বলেন, ‘আল-হাইয়াতুল উলিয়া লিল জামিয়াতিল কওমিয়া বাংলাদেশ-এর অধীন বোর্ডগুলো আইন অনুযায়ী গঠিত কমিটির মাধ্যমে নিবন্ধন, কওমি মাদরাসাগুলো দারুল উলুম দেওবন্দের নীতি, আদর্শ ও নেসাব বা পাঠ্যসূচি অনুযায়ী দাওরায়ে হাদিস শিক্ষা কার্যক্রম পরিচালনা করবে।’

খসড়া আইনে কমিটির কার্যক্রম ও কার্যকাল সম্পর্কে বলা হয়েছে জানিয়ে সচিব বলেন, ‘এই কমিটি সনদ বিষয়ে যাবতীয় কার্যক্রমের ক্ষেত্রে সর্বোচ্চ সিদ্ধান্ত গ্রহণকারী বলে বিবেচিত হবে। এই কমিটির মাধ্যমে নিবন্ধিত মাদরাসাগুলো দাওরায়ে হাদিসের সনদ মাস্তার্স (ইসলামিক স্টাডিজ ও আরবি) সমমান বিবেচিত হবে। দাওরায়ে হাদিসের সিলেবাস প্রণয়ন, পরীক্ষা পদ্ধতি, পরীক্ষার সময় নির্ধারণ, অভিন্ন প্রশ্নপত্র প্রণয়ন, উত্তরপত্র মূল্যায়ন, ফলাফল ও সনদ তৈরিসহ আনুষঙ্গিক কার্যক্রম পরিচালনার জন্য এক বা একাধিক উপকমিটি গঠন করতে পারবে। কমিটি এ বিষয়গুলো শিক্ষা মন্ত্রণালয়কে জানাবে।’ এই কমিটির এক-তৃতীয়াংশ বা ১১ জনের উপস্থিতিতে কোরাম পূর্ণ হবে। কমিটি দলীয় রাজনীতির উর্ধ্বে থাকবে বলেও খসড়া আইনে উল্লেখ করা হয়েছে।

এই আইনের উদ্দেশ্য পূরণে বিধি ও সংবিধি প্রণয়ন করা যাবে বলেও জানান মন্ত্রিপরিষদসচিব। কমিটিতে সরকারের কোনো প্রতিনিধি নেই—এ বিষয়ে দৃষ্টি আকর্ষণ করা হলে তিনি বলেন, ‘এটা আসলে কমিটি যেটা ছিল সেটাকে বোর্ড আকারে নিয়ে আসা হয়েছে। ছয়টি বোর্ডকে একীভূত করে বোর্ড করা হয়েছে।’

বিশ্ববিদ্যালয়ের অ্যাফিলিয়েশন ছাড়া মাস্টার ডিগ্রি কিভাবে দেওয়া হবে—এই প্রশ্নের জবাবে শফিউল আলম বলেন, ‘এটি একটি ব্যতিক্রমী বিষয়। এটি হলো মূলত কওমি মাদরাসায় পড়ালেখা করা প্রায় ১৫ লাখ শিক্ষার্থীকে মূলধারায় নিয়ে আসা। সরকারের এই কাঠামোতে নিয়ে আসার বিষয়টি যুগান্তকারী পদক্ষেপ।’

ইসলামিক আরবি বিশ্ববিদ্যালয় আছে, সনদ দেওয়ার দায়িত্ব তাদের দেওয়া যেত—এ বিষয়ে মন্ত্রিপরিষদসচিব বলেন, ‘আইনে এ বিষয়ে কিছু বলা নেই, ভবিষ্যতে হয়তো বিবেচনায় আসতে পারে।’ মাস্টার্সের আগের ডিগ্রিগুলোর স্বীকৃতি না দিয়ে সর্বোচ্চ ডিগ্রিকে কেন স্বীকৃতি দেওয়া হলো জানতে চাইলে তিনি বলেন, ‘এটা গভর্নমেন্টের পলিসি, আইনের বাইরে আমাদের ব্যাখ্যা দেওয়ার সুযোগ নেই। ওখানে দাওয়ায়ে হাদিসটাকে চূড়ান্ত শিক্ষা সমাপনী হিসেবে গণ্য করা হয়।’

গতকালের মন্ত্রিসভা বৈঠকে ‘বাংলাদেশ মৎস্য গবেষণা ইনস্টিটিউট আইন, ২০১৮’-এর খসড়াও চূড়ান্ত অনুমোদন দিয়েছে।

[Print](#)

সম্পাদক : ইমদাদুল হক মিলন,

নির্বাহী সম্পাদক : মোস্তফা কামাল,

ইস্ট ওয়েস্ট মিডিয়া গ্রুপ লিমিটেডের পক্ষে ময়নাল হোসেন চৌধুরী কর্তৃক প্লট-৩৭১/এ, ব্লক-ডি, বসুন্ধরা, বারিধারা থেকে প্রকাশিত এবং প্লট-সি/৫২, ব্লক-কে, বসুন্ধরা, খিলক্ষেত, বাড্ডা, ঢাকা-১২২৯ থেকে মুদ্রিত।

বার্তা ও সম্পাদকীয় বিভাগ : বসুন্ধরা আবাসিক এলাকা, প্লট-৩৭১/এ, ব্লক-ডি, বারিধারা, ঢাকা-১২২৯। পিএবিএক্স : ০২৮৪০২৩৭২-৭৫, ফ্যাক্স : ৮৪০২৩৬৮-৯, বিজ্ঞাপন ফোন : ৮১৫৮০১২, ৮৪০২০৪৮, বিজ্ঞাপন ফ্যাক্স : ৮১৫৮৮৬২, ৮৪০২০৪৭। E-mail : info@kalerkantho.com